

Visoki predstavnik / specijalni predstavnik EU Schwarz-Schilling odao priznanje za napredak koji je ostvarila Obavještajno- sigurnosna agencija BiH (OSA)

Visoki predstavnik i specijalni predstavnik EU Christian Schwarz-Schilling sastao se danas u sjedištu Obavještajno-sigurnosne agencije BiH (OSA) u Sarajevu sa generalnim direktorom Almirom Džuvom, zamjenikom direktora Ristom Zarićem i glavnim inspektorom Ivanom Čosićem.

Generalni direktor Džuvo izvijestio je visokog predstavnika/specijalnog predstavnika EU o napretku ostvarenom tokom proteklih mjeseci u jačanju reforme obavještajnog sektora u BiH, uključujući i završetak svih prelaznih mjera predviđenih Zakonom o Obavještajno-sigurnosnoj agenciji. On je također izrazio zahvalnost za institucionalnu podršku OHR-a i Misije OSCE-a. Kao što je predviđeno zakonom, OSA je već uspostavila radne odnose sa mnogim stranim obavještajnim službama. Ova saradnja dala je rezultate u vidu značajnih informacija o trenutnim prioritetima u oblasti protuterorizma, organiziranog kriminala i ratnih zločina. Generalni direktor Džuvo istaknuo je da je OSA dosljedno radila kako bi poboljšala svoju efikasnost i dobre veze sa domaćim organima vlasti i agencijama za provedbu zakona.

Visoki predstavnik/specijalni predstavnik EU pozdravio je način na koji se reforma obavještajnog sektora odvijala do danas te je odao priznanje rukovodstvu OSA-e za njihov aktivan angažman, pažnju posvećenu novim sigurnosnim prijetnjama i

sposobnost da naprave adekvatnu ravnotežu između različitih potreba koje se pojavljuju u ovoj osjetljivoj oblasti. On je također naglasio potrebu da se intenziviraju naponi kako bi se locirali i uhapsili optuženici za ratne zločine, te značaj očuvanja regionalnog i globalnog pristupa u razmjeni obavještajnih podataka.

Generalni direktor također je izvijestio Schwarz-Schillinga o napretku postignutom u procesu digitalizacije i pohranjivanja dokumentacije o ratnim zločinima, zahvaljujući finansiranju koje je obezbijedila norveška vlada. Visoki predstavnik/specijalni predstavnik EU izrazio je zadovoljstvo onim što je vidio i čuo o ovom značajnom projektu, čiji je cilj osigurati zadovoljavajuću razmjenu informacija između OSA-e i njenih partnera – Međunarodnog haškog tribunala, domaćih policijskih agencija i organa tužilaštva.